

No. 87. 1422. 7. Jan.

*Rathsstatut in Betreff der Betreibung des Fleischerhandwerks.*

Wir rathmanne gesworne der stad Pirne Nicol Vynker burgermeister, syne eitgnossen Nicol Ve[rhe], Herman Seiler, Petir Snebach . . Tycze Müldener, Hannus Schobir, Nickel Gruner, Donat . . , Johannes Janspach, [Nicol] Schocher, Nickel Scheder vnd Jacoff Judenschuler bekennen —, das wir myt gvtem vorrathe, . . wisse vnd wille vnser eldistn vnd mit wisse der vier meistere, die zcu der cziit in den hantwerken . . gewest synt, das wyr den fleischern deme ganczen hantwerke gegunst, erloubit vnd zeugegeben habin . . . hantwerke zcugute, so das keyn fleischer myt den meistern zcu benken stehin sal, her habe denne eyn elich wyp. Were ouch, das eyn meister stürbe vnd lisse eyn wyp myt kindern addir kynde, so mag das wyp mit den kyndern yr meisterrecht wol haben vnd behalden, ab dy kinder alzo kewerbelik(?) addir so mundik [weren], das sy zcu benken gestehin mochten; hat das wip abbir keyne kinder, so sal sy glichewol ir meister recht haben vnd mag eynen knecht myten, der von yrent weiin zcu benken steit. Weres ouch, ab eynem meister syn wip sturbe, der mag eyn andir wip nemen adir mag ane wip bliben, wy her wil, der mag glichwol syn meisterrecht behalden, alzo her vor hatte. Ouch so en sal keyn fleischer den andern vzmyten vz der bang, do her ynne steit addir ynne gestanden hat, die wyle der meister . . addir dem biddermanne, des die bang ist, synen . . [ge]bit, vnd abbir burgen von ym dor vmbe begert, das her ym den czins wol bürgen mag. Ouch so sullen dy fleischer eynen . . slag vndir den benken habin, vnde sullen den redelichin haldin vnd alle yar an hebin an senthe Michels tage, vnd sal stehin biz uffs heiligen Crists tag, das eyn itzlich meister uff dem hantwerke denne uff sÿn lyb slahen mag, wy<sup>e</sup> vyl her wil addir was her wil, das gêbe vnde redelichen ist. Ouch so sal yr keyner sÿhin fleisch addir vngebe fleisch vndir den benken fyle haben noch vorkowfen. Ouch so wollen wyr sy<sup>e</sup> sust by itzlicher yrer gewonheit vnde rechten lassen vnde do by behalden, alzy vor aldir vnd bis herhe gewest synt vnde gehat haben. Doch uber das allis, so sullen sy es haldin in allen dyngen uff dem hantwerke noch der burger rathe, der nÿ ist addir yn czukumftigen geczythen syn wirt; was der denne vor das nôtzste vnd vor das besté erkennen würde, das sy es denne ouch dornoch sullen halden. Vnde des zeû orkûnde vnde bekentnisse alle disser vorgeschrebin rede so haben wir vrogenanten rathmanne vnser stad groser ingesegel an dissen offenn briff lassen hengen. Gegeben noch Cristis gebürt virczhenhundert iar dornoch in deme czwey vnde czwenzigisten iare an der mittewoch post Epyphaniae domini.

Nach dem sehr beschädigten Orig., welches lange Zeit als Umschlag einer Stadtrechnung gedient hat, im Rathsarchiv zu Pirna. Das Stadtsiegel ist abhanden gekommen.